

Saturday, October 25, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

MNF PRESS CONFERENCE

MNF party Legal Board Vice Chairman Pu Lalpianfela Chawngthu chuan YMA inkhawmpui lian palaite hma lehzela dawt chiang tak sawi duh Mizoramin Chief Minister a nei mek chu vanduaithlak a tih thu a sawi.

Wawiina MNF Legal Board in Aizawl Press Club-a chanchinbumite an kawmnaah he thu hi sawiin Pu Lalpianfela Chawngthu chuan YMA inkhawmpui lian vawi-75 na, Sakawrdaia neih zawh takah amah ngei pawhin dan sakei tia a lo sawi thin, FCAA 2023 Mizorama hman ve a duh leh tak thut chhan sawifiah tumna atan YMA inkhawmpui lian Chief Minister in a hman duh tlat tih a sawi a. Central sorkarin ram venhimna changchawia Mizoram chhung, a duhlai apianga hma a lak theihna tur chin, ramdang nena inrina atanga boruaka teha km. 100 chin tih FCAA 2023-a tarlan chu km 10 chin chauh angin a sawi tih a sawi a.

Hei bakah hian Central sorkarin sipaite bu khuarna tura ram hectare 10 chin, forest clearance buaipui ngai lova rawn luah theihna tur pawh Left Wing Extremist te awmna state chauh huam tur ang leh Mizoram huam ve lo angin dawt chiang tak a sawi bawk tih Pu Lalpianfela Chawngthu chuan a sawi a. Left Wing Extremist te awmna state-a sipaite hmun khuar theihna tur hi chu a hranga tarlan niin, hectare 5 aia zau loah tih a ni zawk tih a sawi a. Hei hi duhtawh loin guidelines lo chhuakah ram venhimna changchawia Central sorkarin hma a lakna turahte State sorkarah dil phawt tur a nih thu leh State thuneihna a sang ta a ni tia dawt bawk a sawi zawm leh thu a sawi a. Guidelines ah hian state sorkarah dil tur tih reng reng a awm loh thu leh thuneihna tawp chu central sorkar kutah zel dah a nih thu a sawi a. Guidelines Para 28 ah chuan Central Sorkarin a tul ang zelin, state sorkarte hnenah hmalak dan tur a hriattir ang tih tarlan a nih thu leh, FCAA 2023 Rules a ni emaw, Guidelines a ni emaw, thuneihna tawp chu Central sorkar kutah vek thu a sawi a ni.

CM pawhin a hriat chian lo dan, Mizorama hman a nih ve theihna tur official resolution Assembly House- ah a naute a pass pui ta mai hi a vanduaithlak hlea an hriat thu MNF Legal Board Vice Chairman chuan a sawi a. Assembly in a lo pawm tawhna official resolution hnukir a nih leh theihnana Special Assembly kohna tichhuak turin an ngen nawn tih an sawi a. MNF in tun thla ni 29-a total bandh a huaihawt tur chu Zoram mipui zawng zawngte ram leh hnam tan a ni tih hria a, thlawpa tawiawm theuh tura an ngen thu a sawi bawk a ni.



SARAS FAIR

Thingtlanga kuthnathawktu hmeichhiate tharchhuah zawrhna, Sales of Articles of Rural Artisans Society (SARAS) fair vawi - 11na chu kumin ah huaihawt a ni leh dawn a, October ni 28 atanga November ni 1 inkarah hman tura ruahman a ni.

Rural Development Department hnuaia Mizoram State Rural Livelihood Mission (MzSRLM) leh Urban Development & Poverty Alleviation tangkawp buatsaih SARAS Fair leh SHG Mela khuhhawna hi UD&PA Minister Pu K. Sapsedang'a hmanpui dawn a, RD Minister Prof Lalnilawm'n SELHEL Brand thar a hawng dawn a ni.

SARAS Fair ah hian dawr hrang hrang 100 awm tura ruahman a ni a, SHG RD Block 28 atangin heng dawr hrang hrang hi an luah dawn a, zing dar 10 atanga zan dar 8 thleng hawn tura ruahman a ni a, thil eina tur Food Court ah dawr 9 a awm baw k ang.



ASSAM RIFLES RECOVER WEAPONS

Assam Rifles te chuan nimin khan Champhaia Saikhumphaiiah ralthuam thahnem tak an man.

Assam Rifles atanga Akashvani thudawn danin ralthuam an man te hi ramhnuaiah bawm chhunga thuhruk a ni a. An man te hi 60mm Mortar tube paruk, Myanmar siam Assault Rifle pahnih, shot gun pathum, point 22 rifle pahnih, hand grenade pakhat, 7.62mm 7.62mm silai mu sawmli, 60mm mortar sawmpanga leh rahpuah bomb pahnih leh radio set pahnih a ni a. A bulhnai an enfiahnaah ralthuam neitu awm hmuh a nih loh thu an sawi a ni.

Ralthuam an man te hi Dungleang police te kutah an hlan a. Chhui zui ngai te chhui zui zel a nih dawn thu an sawi baw k a ni.



PM MANN KI BAAT

Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 127-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni baw k ang.



CHHATH FESTIVAL

Prime Minister Narendra Modi chuan Chhath Mahaparv pualin ram mipuite chibai a buk.

Prime Minister hian Social media post-ah ni li awh tur he kut hian awmzia thuk tak a nei a ti a, Khawvel pum huapa Chhath hriat hlawh chho zel chu lawmawm a tih thu sawiin khawvel puma India mi te chuan an thinlung zawng zawngin an lawm tih a sawi.

Chhath festival hi Hindu kû, Ni pathian Surya leh a nupui Chhathi Maiya biakna atana hman thin a ni. Ni li chhung awh niin chaw nghei te, luia tui a inbual

te, ni tlak leh ni chhuak tur thilhlan te a lawm thin a ni. India ram hmun thenkhat Bihar, Jharkhand, leh Uttar Pradesh-ah te hman thin a ni.

